



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ
ՈՐՈՇՈՒՄ**

27 հունիսի 2011 թվականի №307Ն
քաղ. երևան

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ
ԿԱՐԳԱՎՈՐՈՂ ՀԱՆՁՆԱԺՈՂՈՎԻ 2006 ԹՎԱԿԱՆԻ ԴԵԿՏԵՄԲԵՐԻ 27-Ի №358Ն
ՈՐՈՇՄԱՆ ՄԵՋ ՓՈՓՈԽՈՒԹՅՈՒՆՆԵՐ ԿԱՏԱՐԵԼՈՒ ՄԱՍԻՆ**

Հիմք ընդունելով «Էներգետիկայի մասին» Հայաստանի Հանրապետության օրենքի 17-րդ հոդվածի 1-ին մասի ե) կետը՝ Հայաստանի Հանրապետության հանրային ծառայությունները կարգավորող հանձնաժողովը **որոշում է.**

1. Հայաստանի Հանրապետության հանրային ծառայությունները կարգավորող հանձնաժողովի 2006 թվականի դեկտեմբերի 27-ի «Էլեկտրական էներգիայի մատակարարման և օգտագործման կանոնները հաստատելու մասին» №358Ն որոշման 1-ին կետով հաստատված հավելվածում՝ «Էլեկտրական էներգիայի մատակարարման և օգտագործման կանոններում» (այսուհետ՝ Կանոններ) կատարել հետևյալ փոփոխությունները.

- 1) Կանոնների 2-րդ գլուխը շարադրել նոր խմբագրությամբ.

**«ԳԼՈՒԽ 2. ՆՈՐ ՍՊԱՌՈՂԻ ԿԱՄ ՍՊԱՌՈՂԻ ՎԵՐԱԿԱՌՈՒՑՎՈՂ
ՍՊԱՌՄԱՆ ՀԱՄԱԿԱՐԳԸ ԷԼԵԿՏՐԱԿԱՆ ՑԱՆՑԻՆ ՄԻԱՑՆԵԼՈՒ
ՊԱՅՄԱՆՆԵՐԸ**

13. Նոր սպառողի կամ սպառողի վերակառուցվող սպառման համակարգը էլեկտրական ցանցին միացման ծախսերը (ներառյալ նախագծանախահաշվային, շինհավաքակցման, կարգաբերման-թողարկման աշխատանքները), այդ թվում՝ այլ անձանց էլեկտրատեղակայանքներում

բջիջների տեղակայման աշխատանքների ֆինանսավորումը, կատարում է մատակարարը: Մատակարարը նոր սպառողի կամ սպառողի վերակառուցվող սպառման համակարգը էլեկտրական ցանցին միացման աշխատանքների իրականացման համար գանձում է Հանձնաժողովի 2007 թվականի դեկտեմբերի 21-ի №659Ն որոշմամբ հաստատված միացման վճարներ: Միացման պայմանագրի և Պայմանագրի կնքումն իրականացվում է անվճար:

13.1 Նոր սպառողի կամ սպառողի վերակառուցվող սպառման համակարգը էլեկտրական ցանցին միացման վճարները չեն գանձվում, երբ էլեկտրական ցանցին միացված սպառողի սպառման համակարգից առանձնացված նոր սպառողի սպառման համակարգը միացվում է էլեկտրական ցանցին՝ առանց սպառման համակարգի հզորության փոփոխության:

13.2 Նոր սպառողի կամ սպառողի վերակառուցվող սպառման համակարգի միացումը էլեկտրական ցանցին իրականացվում է նոր սպառողի կամ կառուցապատողի կամ սպառողի (այսուհետ՝ Դիմող անձ) գրավոր դիմումի հիման վրա: Դիմող անձը դիմումին կից ներկայացնում է միացվող սպառման համակարգի վերաբերյալ հետևյալ տեղեկատվությունը.

1) պահանջվող հզորությունը, լարման մակարդակը, միացման տեսակը (միաֆազ, եռաֆազ), էլեկտրամատակարարվող տարածքի (շենքի, շինության) նկատմամբ իրավունքները հավաստող փաստաթղթերը, միացման ակնկալվող ամսաթիվը, ինչպես նաև՝ դիմողի հայեցողությամբ, էլեկտրամատակարարման հուսալիությանը վերաբերող լրացուցիչ պահանջները,

2) շինության էսքիզը կամ տարածքի հատակագիծը՝ նշելով սպառման համակարգի միացման կետը կամ էլեկտրական բեռերի տեղաբաշխումը,

3) 0.4 կՎ և բարձր լարման էլեկտրական ցանցին միանալու դեպքում սպառման համակարգի տեխնիկական բնութագրերը:

13.3 Դիմող անձի դիմումը ստանալուց հետո մատակարարը սույն կանոնների

13.4 կետում սահմանված ժամկետներում.

1) մշակում է տեխնիկական պայմանները և 6(10) կՎ և բարձր լարման ցանցերին միացման դեպքում այն համաձայնեցնում սպառողի հետ,

2) մշակում է միացման տեխնիկատնտեսական հիմնավորումները,

- 3) կատարում է բոլոր անհրաժեշտ համաձայնեցումները պետական, տեղական ինքնակառավարման մարմինների և այլ անձանց հետ,
- 4) Դիմող անձին է ներկայացնում միակողմանի կնքված միացման պայմանագիրը (հավելված №2), որով սահմանվում են միացման աշխատանքների ավարտի ժամկետը, միացման վճարի չափը և վճարման կարգը:

13.4 Դիմումը ստանալու օրվանից մինչև միացման պայմանագրի կնքման առաջարկ ներկայացնելու ժամկետը չի կարող գերազանցել՝

1) 0,22 կՎ և 0,4 կՎ մինչև 30 կՎԱ (ներառյալ) հզորությամբ լարման ցանցերին ստանդարտ միացման (երբ նախատեսվում է Հանձնաժողովի 2007 թվականի դեկտեմբերի 21-ի №659Ն որոշմամբ հաստատված ստանդարտ միացման վճար) դեպքում՝ 15 օրը՝ երբ պահանջվում է միացման սխեմայի կազմում.

2) 0,22 կՎ և 0,4 կՎ լարման ցանցերին միացման մյուս բոլոր դեպքերում՝ 45 օրը.

3) Մնացած բոլոր դեպքերում՝ 75 օրը:

13.5 Նոր սպառողի կամ սպառողի վերակառուցվող սպառման համակարգը էլեկտրական ցանցին միացման պայմանագրի կնքման օրվանից մինչև Դիմող անձին Պայմանագիր կնքելու առաջարկ ներկայացնելու առավելագույն ժամկետները չեն կարող գերազանցել՝

1) 0,22 կՎ և 0,4 կՎ մինչև 30 կՎԱ (ներառյալ) հզորությամբ լարման ցանցերին ստանդարտ միացման դեպքում՝ 15 օրը՝ երբ պահանջվում է միացման սխեմայի կազմում.

2) 0,22 կՎ և 0,4 կՎ մինչև 30 կՎԱ (ներառյալ) հզորությամբ լարման ցանցերին միացման այն դեպքերում, երբ պահանջվում է նախագծային փաստաթղթերի կազմում՝ 45 օրը.

3) 0,4 կՎ լարման 30 կՎԱ և բարձր հզորության դեպքում՝ 90 օրը.

4) 6(10) կՎ լարման սպառողների դեպքում՝ 6 ամիսը.

5) 35կՎ և 110կՎ լարման սպառողների և բազմաբնակարան շենքերի էլեկտրական ցանցին միացման դեպքում՝ 9 ամիսը:

13.6. Այն դեպքում, երբ նոր սպառողի կամ սպառողի վերակառուցվող սպառման համակարգը էլեկտրական ցանցին միացման համար անհրաժեշտ է սպառողի պահանջածից ավելի բարձր լարման սնող գծի կամ ենթակայանի կառուցում, ապա միացման առավելագույն ժամկետը ընդունվում է համապատասխան բարձր լարման սպառողին էլեկտրական ցանցին սույն կանոնների 13.5 կետով նախատեսված միացման ժամկետը:

14. Պայմանագիր կնքելու և էլեկտրամատակարարումը սկսելու համար Դիմող անձը Մատակարարին է ներկայացնում էլեկտրամատակարարվող տարածքի (շենքի, շինության) նկատմամբ իրավունքները հավաստող փաստաթղթերը, իսկ 6(10) կՎ և բարձր լարման ցանցին միանալու դեպքում նաև՝ պետական տեխնիկական վերահսկողություն իրականացնող լիազորված մարմնի կողմից տրված էլեկտրատեղակայանքների գործարկման եզրակացությունը (թույլտվությունը):

14.1 Ճարտարապետահատակագծային առաջադրանք ձևավորելու փուլում, առաջադրանք տվող իրավասու մարմինը էլեկտրական ցանցին միացման տեխնիկական պայմաններ ստանալու նպատակով դիմում է մատակարարին՝ կից ներկայացնելով սույն կանոնների 13.2 կետով սահմանված անհրաժեշտ փաստաթղթերը:

14.2 Ճարտարապետահատակագծային առաջադրանք տվող իրավասու մարմնի դիմումը ստանալուց հետո մատակարարը մշակում և ներկայացնում է տեխնիկական պայմանները՝ Հայաստանի Հանրապետության օրենսդրությամբ II դիսկայնության աստիճանի (կատեգորիայի) դասակարգում ունեցող օբյեկտների համար 5 աշխատանքային օրվա ընթացքում, III դիսկայնության աստիճանի (կատեգորիայի) օբյեկտների համար՝ 10 աշխատանքային օրվա ընթացքում, IV և V դիսկայնության աստիճանի (կատեգորիայի) օբյեկտների համար՝ 15 աշխատանքային օրվա ընթացքում:

14.3 Ճարտարապետահատակագծային առաջադրանք ստացած կառուցապատողը սույն կանոնների 13.2 կետով նախատեսված դիմումի հետ մատակարարին է ներկայացնում նաև ճարտարապետահատակագծային առաջադրանքին կից տեխնիկական պայմանները:

14.4 Սույն գլխում նշված բոլոր ծանուցումները, առաջարկները և համաձայնեցումները մատակարարի կողմից իրականացվում են գրավոր: Դրանք դիմող անձին ներկայացնելու ծախսերը կրում է մատակարարը:»:

14.5 Սույն գլխի դրույթները չեն կիրառվում, երբ՝

- 1) սպառողի սպառման համակարգը էլեկտրական ցանցին միանում է ժամանակավոր (շինարարություն, սեզոնային առևտուր և այլն),
- 2) նոր կամ վերակառուցվող սպառման համակարգը էլեկտրական ցանցին միացնելու համար անհրաժեշտ տեխնիկական պայմանները սպառողին տրվել են մինչև 2008 թվականի փետրվարի 1-ը:

14.6 Հանձնաժողովը, սպառողի և մատակարարի շահերի հավասարակշռման նպատակով, առանձին դեպքերում, ինչպես նաև, երբ սույն կանոնների 13.4 և 13.5 կետերում սահմանված ժամկետներում հնարավոր չէ ապահովել նոր սպառողի կամ սպառողի վերակառուցվող սպառման համակարգի միացումը էլեկտրական ցանցին՝ պետական կամ տեղական ինքնակառավարման մարմինների կողմից մատակարարին տրամադրվող իրավունքների, թույլտվությունների, եզրակացությունների կամ այլ փաստաթղթերի պատճառով, մատակարարի կամ Դիմող անձի դիմումի հիման վրա կարող է սահմանել էլեկտրական ցանցին միացման անհատական որոշումներ: Սույն կետում նշված դեպքերում մատակարարը պարտավոր է դիմել Հանձնաժողովին դրանք ի հայտ գալու պահից ոչ ուշ, քան 10 օրվա ընթացքում՝ ներկայացնելով նաև համապատասխան հիմնավորող փաստաթղթեր: Մատակարարը պարտավոր է այդ մասին նույն ժամկետում իրազեկել նաև դիմող անձին:»:

2) Կանոնների №2 հավելվածի 3-րդ գլուխը շարադրել նոր խմբագրությամբ.

«3. Վճարման կարգը

3.1 Պատվիրատուն վճարում է իր սպառման համակարգը էլեկտրական ցանցին միացման վճարի 50 տոկոսը՝ որպես կանխավճար, սույն պայմանագիրը կնքելուց հետո 5 աշխատանքային օրվա ընթացքում,

3.2 Միացման վճարի մնացած մասը Պատվիրատուն վճարում է սույն պայմանագրի 2.1 կետի 2-րդ ենթակետով սահմանված ժամկետից առնվազն 5 աշխատանքային օր առաջ:»:

3) Կանոնների N2 հավելվածի 4.2 կետը շարադրել նոր խմբագրությամբ.

«4.2 Սույն պայմանագրի 2.1 կետի 2-րդ ենթակետի խախտման դեպքում Մատակարարը Պատվիրատուին վճարում է տույժ՝ օրական սույն պայմանագրի 3.1 կետի համաձայն վճարված կանխավճարի 0,1 տոկոսի չափով, բայց ոչ ավելի քան կանխավճարը»:

2. Սույն որոշումն ուժի մեջ է մտնում 2011 թվականի հոկտեմբերի 1-ից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ
ՀԱՆՁՆԱԺՈՂՈՎԻ ՆԱԽԱԳԱՀ՝**

Ռ.ՆԱԶԱՐՅԱՆ

ք. Երևան
27 հունիս 2011թ.